

Sep Antoni Giger-Venzin, Selva/Sedrun



Siu vitg nativ ei stau Selva. Leu eis el naschius ils 17 d'october 1907 sco tierz affon da Gion Battesta Giger e Culastia naschida Peder. Sia affonza ha el passentau ensemencun ses dus frars el ravugl d'ina buna famiglia. Lavur ed occupaziun han buca muncau. Stadas terminadas las scolas dil vitg serenda Giusep Antoni egl jester. Il bab Gion Battesta ei morts igl onn 1919 ed ei drova segidar cun la mumma. Aschia eis el satus fumegl el Tessin tier la firma da calzers Bally che havevan in grond puresser. Silsuenter retuorna el a casa a Selva e semetta en a far il pur. Igl onn 1935 marida el la Ludivina Venzin da Selva. La lètg crescha e gleiti selegran il geniturs dils siat affons, sis buobas ed in buob. Quels portan bia legria, denton era enqual fastedi e quita.

Suenter il barschament da Selva digl onn 1949, e lu igl onn da lavinas 1951, serenda la famiglia el Tessin. Leu surpren el in grond menaschi puril. Il schar encrescher denton mudregia il Giusep Antoni aschizun ch'el vegn malsaus e sto returnar en siu vitg nativ Selva. Tochen tier la pensiun fa el ussa il pur da muntogna. El fuva in pur engaschau cun tgierp ed olma, inschignus e versaus e saveva trafficar empau diltut. Dasperas fuvan la catscha ed igl ir per crappa ses gronds plaschers.

Igl onn 1970 secasa el a Sedrun. Ils onns suenter la pensiun vegn el mudergiaus da malsognas e sto purtar enqual crusch. Era la mort da sia consorta avon otg onns ei ina greva sort, denton anfla el in bien dacasa e tgira tier sia feglia a Sedrun. Avon in onn e miez ei lu ina malsogna dil cor s'annunziada. Ils 30 da settember 1996 cloma il Segner a casa siu survient ella biala vegliadetgna dad 88 onns. El ruaussi en pasch.